

餘干縣志卷之十二

人物志

名臣處士

宦業忠義

理學孝友

文苑

篤行

山川靈淑代有偉人於蕃於宣勲策名臣羣雅熙
績聖學傳薪芳漱六藝品禋五倫為國効蓋與俗
還淳扶世翼教千古經綸著蔡以奉昭華媿珍懿
哉曩哲炳炳麟麟志人物

名臣

漢

吳芮習泰鄉五彩人父申一名裕吳夫差六世孫有

餘干縣志

卷之十二

人物

名臣

一

高節周末事楚考烈王諫春申君徙封吳得罪謫番
陽有齊人說入齊不從遷餘干習泰鄉施仁行義遠
近稱長者所居山生芮時五彩雲見人遂名五彩山
芮好義有父風秦二世時為番陽令值陳涉兵起天
下苦秦多殺長吏應涉芮甚得江湖閒民心號曰番
君起兵保番英布亡江中為羣盜陳涉之起也乃率
眾歸番君芮以女妻之項梁起江東芮率越人應諸
侯沛公攻南陽遇芮將梅鋗與攻析酈降之及項籍
相王以芮率百越佐諸侯從入關故立芮為衡山王

都邾其將梅鋞功多封十萬戶爲列侯籍滅高祖德
芮徙封長沙都臨湘詔曰故衡山王吳芮與子二人
兄子一人從百越之兵以佐諸侯誅暴秦有大功諸
侯立以爲王項羽侵奪之地謂之番君其以長沙豫
章象郡桂林南海立番君芮爲長沙王明年詔將兵
定閩至贛之金精山卒諡文王子成王臣嗣十一年
布以漢誅韓彭疑懼反明年高祖擊敗布布走歸彭
蠡臣遺書一訣一迎布曰漢使在城臣懷疑不安故
脫身回餘干亟欲會以定亡反布以婚媼故從之輕

餘干縣志

卷之十二

人物

名臣

二

騎徑往夜宿茲鄉田舍閒伏兵殺之君子以臣爲國
誘不必信也成王卒子哀王回嗣卒子共王右嗣卒
子靖王著嗣孝文帝後七年著卒無子國除初高祖
賢王芮制詔御史長沙王忠其定著令至孝惠高后
時封列侯國二芮庶子淺便侯臣庶子陽沅陵侯淺
卒信襲封信卒廣志襲封陽卒福襲封福卒周襲封
無子廣志卒千秋襲封坐酎金國除

梅鋞安樂鄉梅港人吳芮之爲番陽令天下方亂芮
以鋞爲將教練士卒保番民故番有督軍湖

卽今湖東項

梁起兵江東芮率越人應之以鎬領兵至南陽從沛
公降析酈二邑至咸陽從項羽入關有功封十萬戶
爲列侯

舊志

梁

陞襄字師卿本名衰字趙卿有奏事者誤爲襄梁武
帝乃改爲襄字師卿天監三年都官尙書范岫表薦
襄起家著作佐郎後昭明太子統聞襄業行啓武帝
引與遊處自廬陵王起室除太子洗馬遷中舍人並
掌管記出爲揚州中從事以父終此官固辭武帝不

餘干縣志

卷之十二

人物

名臣

三

許聽與府司馬換廨居之昭明太子敬耆老襄母年
將八十與蕭琛傅昭陸杲每月常遣存問加賜珍羞
衣服襄母常卒患心痛醫方須三升粟漿時冬月日
又逼暮求索無所忽有老人詣門貨漿量如方劑始
欲酬直無何失之時謂襄孝感所致後爲太子家令
復掌管記母憂去職襄年已五十毀頓過禮太子憂
之日道使誠諭大通七年爲番陽內史先是鮮于琮
服食修道法常入山采藥拾得五色幡毼又於地中
得石璽竊怪之琮先與妻別室望琮所處常有異氣

益以爲神大同元年遂結門徒殺廣晉令王筠號上
願元年署置官屬其黨轉相誑惑有眾萬餘人將出
攻郡襄先已率人吏修城隍爲備及賊至破之生獲
琮時鄰郡豫章安城等守宰案其黨與因求貨賄皆
不得其實或有善人盡室罹禍唯襄郡枉直無濫人
作歌曰鮮于抄後善惡分人無橫死賴陸君又有彭
李二家先因忿爭遂相誣告襄引入內室不加責誚
但和言解喻二人感恩悔咎人又歌曰陸君政無怨
家鬪旣罷讐共車在政六年郡中大寧郡人李睨等

餘干縣志

卷之十二

人物

名臣

四

四百二十人詣闕拜表陳襄德化求於郡立碑降勅
許之又表乞畱襄固乞還大清元年爲度支尙書侯
景圍臺城以襄值侍中省城陷襄逃還吳景將宋子
仙進攻錢唐會海鹽人陸黯舉義襲郡殺僞太守蘇
單于推襄行郡事時淮南太守文成侯蕭寧逃賊入
吳襄遣迎寧爲盟主遣黯及兄子映公帥眾躡子仙
與戰黯敗走吳下軍聞之亦散襄匿於墓下一夜憂
憤卒襄弱冠遭家禍釋服猶若居憂口不言殺害五
十年侯景平元帝贈侍中追封餘干縣侯

南史列傳

宋

章公弼字右夫古埠人紹聖元年進士事親孝謹母
 歿廬墓三年有學識歐陽修甚器之授建寧主簿章
 惇以詩餞公弼曰文章乃道德光華者惇詩何為聞
 朝廷罷劉摯范純仁託疾不起建中靖國中以恩例
 除太常丞太觀初通判贛州得民心俄以禮部主客
 員外去職宣和初召陞禮部侍郎以疾歸有文集若
 干卷參林志舊志附載京城隍有物掠小兒食上命
 禮部監有司致祭祭城隍公弼曰城隍正直之
 神未必害民祇以公文責城隍除之害遂止

餘干縣志

卷之十二

人物

名臣

五

趙汝愚字子直宋乾道宗室進士第一漢恭憲王元
 佐七世孫祖不求監餘干酒稅因家焉汝愚早有大
 志每曰丈夫得汗青一簡始不忝所生既擢進士見
 孝宗即陳自治之策孝宗稱善光宗既受禪嘗五日
 一朝孝宗於重華宮紹熙二年往往以傳旨免汝愚
 往復規諫光宗意悟時官尚書吏部矣四年同知樞
 密院事遷知院事五年六月孝宗崩光宗不能喪宰
 相畱正與汝愚議介少傅吳琚請憲聖太后垂簾暫
 主喪事七月畱正入奏立皇子嘉王為太子以安人

心御批付丞相歷事歲久念欲退閑正懼遁去人心搖動汝愚自度宗臣不能辭其責與徐誼葉適謀遣知閤門韓侂胄以內禪之意請於憲聖汝愚以國本係乎嘉王誠欲爲宗社之計使命出簾帷之間事行廟堂之上則體正言順可無後艱甲子禫皇子嘉王入汝愚率百官詣大行前率同列再拜奏憲聖簾下出所擬太皇太后指揮以進憲聖覽畢曰甚善乃命皇子卽皇帝位行禫祭禮汝愚卽喪次乞召還畱正

事詳宋史

是月命汝愚兼權叅知政事除右丞相辭不拜

餘干縣志

卷之十二

人物

名臣

六

改樞密院使侂胄欲推定策功汝愚不可曰吾宗臣汝外戚也侂胄大失望會孝宗攢汝愚與畱正議不合因間之於帝八月手詔罷正知建康復命汝愚爲右丞相汝愚怒侂胄黜正及來謁不遂見之侂胄慚忿趙彥逾亦自以有功冀汝愚引與同列而除四川制置乃與侂胄合謀閒汝愚元年春李沐奏宗臣將不利社稷遂罷汝愚右相除觀文殿學士知福州提舉洞霄宮國子祭酒李祥博士楊簡上書訟汝愚忠李沐併劾罷之復編管言者呂祖儉等十一月謫寧

遠軍節度副使永州安置迪功郎趙師召亦上書乞
斬汝愚汝愚怡然就道至衡州病作爲守臣錢鏐所
窘暴卒天下聞而冤之時慶元二年正月壬午也汝
愚鯁直果毅歷事三宗起家自宣義郎至右相其知
信州台州除江西轉運判官多惠政有聲權給事中
言內侍陳源駁張說改密院文書經門下省舊制權
吏部侍郎論出王抃帥福建陛辭言國事之大者四
謂吳氏四世專蜀宜以漸抑之制置四川諸羌蠻相
挺爲患計分其勢其學務有用常以司馬韓富自期

餘干縣志

卷之十二

人物

名臣

七

凡平昔所聞於師友如朱熹張栻呂祖謙汪應辰王
十朋胡銓李燾林光朝之言期次第行之所著有詩
文十五卷太祖實錄舉要若干卷類宋諸臣奏議三
百卷汝愚聚族而居門內三十指所得廩給悉分與
之菜羹蔬食恩意均洽人無閒言自奉甚薄爲夕郎
時大冬衣布裘至爲相亦然汝愚旣歿旋復資政殿
學士贈少保侂胄誅盡復原官諡忠定贈太師追封
沂國公理宗詔配享寧宗廟庭追封福王進封周王
子九人長崇憲憲子必愿皆諒直至大官曾孫良淳

知安吉州死難初汝愚既登進士第一歸謁趙彥端
彥端故與汝愚父善應遊語之曰謹無以一魁置胸
中又曰士大夫家多爲富貴誘壞又曰今日得上一
二語獎諭明日於宰相處得一二語褒往往喪所守
汝愚拱手曰謹受教

舊志

按福建通志汝愚知福州時福州城西舊有湖漑
田數萬畝豪猾湮塞之汝愚請開濬遂爲永利又
周公謹齊東野語載汝愚永州安置至衡州卒朱
熹爲註離騷以寄意焉註離騷事郡邑志皆載之
謂朱子弔忠定至餘干寓東山作是書然朱子年
譜及傳俱不載獨公謹能著其說特表出之

餘干縣志

卷之十二

人物

名臣

八

趙崇憲字履常淳熙八年以取應對策第一越三年
復以進士對策擢甲科初仕爲保義郎監饒州酒庫
改撫州軍事推官汝愚帥蜀隨書寫機宜文字改江
西轉運司幹辦公事汝愚既貶死崇憲闔門自處居
數年汝愚復故官改奉議郎知南昌奉行荒政所活
甚眾升籍田令制曰爾先人有功王室中更讒毀思
其功而錄其子國之典也崇憲拜命感泣陳疏力辭

以爲先臣之寃未悉昭白而其孤先被寵光非公朝所以勸忠孝厲廉恥之意俄改監行在都進奏院復乞以所陳下三省集議若先臣心跡有一如言者所論卽近日恩典皆爲冒濫先臣復官賜諡與臣新命俱合追寢如公論果謂誣讎乞昭示中外使先臣讒謗旣辨忠節自明而憲聖慈烈皇后擁佑之德益顯然後改正誣史垂萬世之公又請正趙師召妄貢封章之罪究蔡璉與大臣爲仇之奸毀龔頤正續稽古錄之妄詔兩省史官考訂以聞已而吏部尙書兼修

餘干縣志

卷之十二

人物

名臣

九

國史樓鑰等請施行如章從之復言誣史未正前日史官徒以權臣風旨刊舊史焚元藁畧無畱難今詔旨再三莫有慨然奮直筆者何小人敢肆爲惡而謂之君子者顧不能勇於爲善耶聞者愧之其後玉牒日歷所重修龍飛事實進呈因崇憲請也未幾擢軍器監丞改太府監丞遷秘書郎辭弗許尋爲著作郎兼權考功郎嘗因求言上封事謂今日有更化之名無更化之實人才國之元氣而忠鯁擯廢之士死者未盡省錄存者未悉褒揚言論國之風采其間輸忠

無隱有所規益者豈惟獎激弗加蓋亦罕見施用媮安取容無所建明者豈惟黜罰弗及或乃遂階通顯至若防左右近習竊弄之漸察奸險餘黨窺伺之萌皆懇懇言之請外知江州郡民歲苦和糴疏於朝永蠲之且轉糴旁郡穀別廩儲之以備歲儉瑞昌民負茶引錢積十七萬緡有竒困不能償死則以責其子孫會新券行崇憲亟請以新券一償舊券二詔從之受賜者千餘家刻石紀其事修陂塘凡數千所提舉江西常平兼權隆興府及帥漕司事遷轉運判官仍

餘干縣志

卷之十二

人物

名臣

十

兼帥事初汝愚捐私錢百餘萬創養濟院歲久寢移爲他用崇憲至尋修復立規約以愈疾多寡爲賞罰棄兒於道者亦收鞠之社倉久敝訪其利害更張之以直秘閣知靜江府廣西經畧安撫靜江屬邑十而陽朔修仁荔浦賦獨倍自張栻奏減人猶以爲病崇憲請再加蠲減三縣民立祠刻石瓊守激黎峒之變劾去之蘿蔓峒仍歲寇鈔民何嚮父子實陰導之崇憲購得嚮等置之法因嚴民夷交通之禁使邊民相什伍寇至則鳴鼓召眾先後掩擊俘獲者賞不至者

有懲先是部內郡邑有警輒移統府兵戍之崇憲謂根本單虛非所以窒奸萌迺各置兵而斂戍者以歸邕自狄青平儂智高設防扞者甚至歲久寢弛而溪峒日強崇憲條上其議朝廷頗采納然未及盡用也崇憲天性篤孝居父喪月餘始食食小祥始茹果實終喪不飲酒食內比御猶弗入者久之

宋史稍節

趙必愿字立夫崇憲子也未冠丁大母憂哀毀骨立服闋以大父汝愚遺表補承務郎調常熟丞嘉定七年舉進士知崇安縣剖決如流吏不能困修學政立

餘干縣志

卷之十二

人物

名臣

十一

催科法列戶爲三等以三期爲約民皆感懼願輸草胥吏鬻鹽之弊擅發光化社倉活饑民帥怒逮吏必愿曰芻牧職也吏何罪束擔俟譴帥無以詰而止均惠倉無所儲必愿捐緡錢增糴至二千石力主義役法鄉選善士任推排勉有產者買田助役有感化者出己田以倡遂徧行一邑上下便之臺府以聞下其式於八郡秩滿民共立祠刻石丁父憂居喪盡禮貽書問學於黃幹服除歷差知全州陞辭乞下道江二州訪周惇頤之後知處州陳折帛納銀之害皆得請

移泉州罷白土課及免差吏課鐵諷諸邑行義役秋
旱力講行荒政乞撥永儲廣儲二倉米振救差主管
官告院越五日兼知台州端平元年以直秘閣知婺
州至郡免催紹定六年分小戶綾羅錢三萬緡有奇
立淳良順慢二籍勸懲人戶措置諸倉積穀奏乞寬
減內帑綾羅申省免用舊例預解諸邑窠名錢罷開
化稅場歷遷度支郎中詔以汝愚配享寧宗從必愿
請也兼右司郎中疏言策免二相消天變也去者固
難以復畱畱者恐終於引去虛鼎席以待故老或意

餘干縣志

卷之十二

人物

名臣

十二

其未必來而況在千里之外責次輔以任大政或意
其不敢專而況不安於其位親擢臺諫開言路也用
之未久者何爲輕於斥去去之未幾何爲使之復來
召於外服者不知果能用之而必堅除自周行者不
知果能聽之而無諱乎朝廷除授軍國賞罰本至公
也今有姓名未達於廟堂而遷擢忽由於中出斥除
三衙竟不指名罪狀而人始得以疑陛下矣一除目
之頒一號令之出雖未必由於闔宦私謁戚畹宗邸
而人或疑之夫天下祖宗之天下非陛下所私有也

陛下雖有去弊之心而動涉可疑之迹亦何樂於此時論偉之三京兵敗必愿條上十事下哀痛之詔合江淮之兵救江陵之急節財用之宜縻請和之使撫無歸之民處北來之眾置鎮撫之使擇帥闡之代拔未用之將皆切於邊要嘉熙元年授右司郎中火災應詔上封事曰開邊稔禍之刑牽制而未行激變棄城之戮姑息而未舉京師淪沒祖宗之基業莫能保江淮蹂躪赤子之冤魂無所依履畝之令下而加以抑配稱提之法嚴而重以告訐民無蓋藏有轉壑之

餘干縣志

卷之十二

人物

名臣

十三

憂士不宿飽有思亂之志又論濟王及國本事遷左司郎中又遷司農少卿兼左司轉對言正氣日消月沮非惟縉紳不肯論事下至草茅之士皆結舌矣歷遷太府卿兼中書門下檢正諸房公事轉對言熒惑失度鬱攸煽災陛下觀時察變何由致此今日之事動無良策惟側身修行祈天永命而已遷起居舍人暫兼權右郎官言陛下約己愛民必如句踐之卧薪嘗膽衛文公之布衣帛冠權吏部右侍郎乞免兼校正從之兼國史修撰時邊事急必愿言宜勅兵調將

遣飛軍結民兵皆中事機遷戶部侍郎暫兼給事中
必愿三以疾乞祠不許權戶部尙書疏言端平元年
洛師輕出雷作於雪宴之先期蜀警於大宴之頒命
戒心一弛赫鑒已隨之矣又乞諭大府丞覈戶部收
支數目二疏迂丞相史嵩之乞免官乞祠皆不許以
司諫鄭起潛論列以寶謨閣直學士奉祠淳祐五年
以華文閣直學士知福州福建安撫使閩人聞必愿
至欣然歎羨必愿平易近民勤於政行鄉飲酒旌退
士獎高年裁僧寺實封之數尤畱意武事措置海道

餘干縣志

卷之十二

人物

名臣

十四

修水戰士卒知勸在官四年屢乞歸不許卒贈銀青
光祿大夫必愿才周器博而又早聞家庭忠孝之訓
師友正大之言故所立卓然可稱云

宋史節

李伯玉字純甫九芝人少從柴元裕遊端平二年進
士第二授觀察推官太學正兼莊文府教授太學博
士召試館職歷詆貴戚大臣直聲暴起改校書郎論
罷尤煇楊棟盧鉞歷官工部侍郎度宗卽位兼侍讀
權禮部侍郎賈似道嘗集百官議事忽厲聲曰諸君
非似道拔擢安得至此眾默然莫敢應者伯玉答曰

平章不拔擢伯玉地步亦可以至此似道雖改容而有怒色退卽治歸以顯文閣待制知隆興府召入覲擢權禮部尙書兼侍讀似道益專國柄帝以伯玉舊學進之卧內相對泣下欲用以參大政似道益忌之伯玉尋病卒初景定彗星見伯玉疏畧云咸平彗出室北呂端有兵謀不靖之言今日當嚴邊備熙寧彗出東井富弼張方平皆言新法不便今日當先罷浙西換田局崇寧彗出西方則詔除黨籍且復左遷官今開慶誤國之人罪惡滔天有一時風聞劾逐者乞

餘干縣志

卷之十二

人物

名臣

十五

酌量寬貸施行以昭聖主寬仁之量又云今言路旣開中外大小之臣必將敷奏惟陛下明聖大臣公亮有以容受不以爲罪天下幸甚又嘗請罷童子科以爲非所以成人材厚風俗趙汝騰嘗薦八士各有品目於伯玉曰銅墻鐵壁立朝風節大較似之著有易

經義斛峯集

舊志

按郡志度宗登極首召饒州尙書三人伯玉與湯漢朱貔孫也伯玉之出猶子思衍餞以詩云絕頂上行誰不愛急流勇退古來難其死也或謂謁似

道被毒云

明

蘇章字文簡北隅人成化十一年進士授兵部職方主事出鎮山海關轉兵部武選主事奉使嶺南還奉命出保定督兵乙巳春正月朔星變有聲如雷時僧繼曉李孜省以方術蠱上心章曰變無驗於此者遂上封事曰天下之道一於正妖僧繼曉賊吏李孜省動以妖術蠱惑人心進稱聖意侮弄朝端傾毀國是臣請戮之通市以聲厥罪又貢獻者外方之所籍以

餘干縣志

卷之十二

人物

名臣

十六

窺天朝也臣願陛下不爲奇珍所眩俾知聖心湛然淫巧工技之不足玩兩京大小臣工宜考察不職許自策免至於請託濫陞官職一切宜罷清心用賢治可立侍也南京兵部尙書王恕宜寘諸左右監闔干政援芘僉壬竄逐忠良宜加禁斥指切時政累數百言未幾謫姚安通判沿途作詩以紀陞松江同知擢知延平府崇學校敦教化均賦歛勸農桑省刑愼罰建寶章閣創道南祠祀楊羅李三大儒梓行其年譜文集問答諸書境內大治漳平寇作躬駐永安設謀

勦捕寇不敢窺還至沙縣里女有遇賊死節者立廟祀之擢浙江參政嬰風疾卒葬北隅蘇家橋先是邑儒胡居仁陷獄賴章以白人益賢之所著滇南行稿邑人段藻刊之以傳

通志參三立考

張侏吉仲子字仲敬正德戊辰進士性直履方勇於爲學其言侃如也爲御史時劉瑾當國上疏乞廣言路以防天下之欺審向背以明天下之情禁侵漁以全天下之命蠲逋負以安天下之心收故老以係天下之望清師江北畱意於紀錄上勦捕流寇策極論餘干縣志

卷之十二

人物

名臣

十七

會試鬻題因劾大臣不職者乞起用謝遷劉大夏韓文楊守隨馬廷用章懋林俊楊廉慮皇嗣未建草疏請育宗室之賢未奏出守紹興道卒

李頤字惟貞南隅人隆慶進士曾祖英號異泉以明經教授山海衛衛故戍卒卽冒青衿而以擊技取大官不甚知書史英至與反復開說士自是始知學頤號及泉曰吾以期及吾曾大父也初授中書舍人同官日宴會徵逐頤弗與獨翻討往實嘗與譚襄敏篆論兵率中欸禫拱手曰後繼我起爲國家干城者其

公乎擢陝西道御史神宗卽位胡濙雖遵景嵩韓必顯以言事得罪朝臣危懼莫敢言頤獨抗疏申救曰祖宗建官設立臺諫廣言路也皇上踐祚未幾一載而四斥言官杖御史胡濙返編氓給事雖遵御史景嵩韓必顯咸謫卑服陛下不過少示創懲使進諫者毋敢輕率妄言非有意怒絕四臣也但四臣久斥則人疑聖怒未回被斥者無由自新而言官益自顧畏羣疑不釋士氣不鼓萬有隱憂伏機誰復犯顏極諫自速罪戾哉凡多所建白時論直之內閣張居正江

餘干縣志

卷之十二

人物

名臣

十八

陵人也頤奉命清戎楚粵江陵在所部一切謝去關白又與居正父抗因忤其意出守湖州備兵蘇州有妖僧謀叛幾萬餘人議據南徐擬元僭號頤伐其謀不數日授首擢浙參政部婺州嚴錮婢之禁總憲三楚歷陝西陞河南右布政會石門兵變兵部薦頤邊才陞御史中丞開府薊門山海衛轄焉英教授處也實三輔重地頤至卽擒首亂者誅之實墉壑明號令簡軍備峙糗糧精閒諜自禫篆經畧後稱雄鎮任十年烽燧無警上嘉頤功賜金幣陞右司馬關白陷朝

鮮逼鴨綠江頤合力勦之上功第一陞右都御史已
遷南掌院右都御史黃河南徙詔以兼司空總河漕
周往相度浚泲河三百里築決口疏故道凡奠泗陵
迅漕運澹水災明議三難咸俾底績甫兩月以勞卒
贈兵部尙書論者謂頤在邊邊重在河河重而河功
尤特著云頤仕宦三十餘年淡泊寧靜雖貴不置側
室內子無衣帛家藏無金玉重器敝車羸馬布衣蔬
食終其身人謂不失異泉家法恩蔭一子以予弟謙
子曰正敷再蔭一孫曰若金知徵江有善政頤初爲

餘干縣志

卷之十二

人物

名臣

十九

御史首請祀胡居仁於文廟見居仁耳孫希祖幼且
貧字以女養之於家

參明史

宦業

唐

余懃南塘人神龍閒進士累官饒州左教練使鎮南

軍節度使左廂兵舊志一作軍一馬使持節襲州刺史工部

尚書兼御史大夫上柱國忠君愛民所至人敬仰之

李儼字雅之西隅人大歷進士德宗時爲左司諫方

士桑道茂奉奏天有天子氣上欲屠其城儼諫曰陛下

始登元極當懲忿窒欲選賢任能以安社稷乃輕信

妖言以害生靈乞斬道茂上悟乃止遷淞西節度判

餘干縣志

卷之十二

人物

宦業

二十

官歲饑活數萬人歸老至今人稱所居坊曰濟川

宋

章穀字仲弓李梅人慶歷進士授興遠簿遷資州軍

事判官遷著作郎賜緋衣金魚通判秀州舶寇千餘

殺掠沿海州郡穀呈制置司得軍二千人又鄉兵二

千人出隘口防禦寇至督戰瀕死又明日寇大至與

戰大敗之生擒二百人斬首三百人民始寧未幾以

疾卒民皆慟哭

通志

都隨字與時西隅人元豐進士有節操嘗以太常少

卿使遼宣上威德遼使至亟問隨起居稱曰長者官至秘閣宗正少卿卒贈大中大夫

通志

吳宗勝習泰鄉五彩人力學篤行治春秋屢舉不第怒投其筆母諭之曰夫學在人第不第在天筆何與元祐六年登第調龍泉尉紹聖二年陞黃岡丞民懷其惠尋知長山泰寧太和大觀四年通判鄧州以軍儲功授光祿少卿直秘閣致仕歸築館延賓積粟帛賑姻族鄉黨嘗戒子曰士之於世學不講德不修無善以教人無澤以及人雖千駟萬鍾於我何益

餘干縣志

卷之十二

人物

宦業

二十一

趙公旦西隅人紹興進士知南城縣剛果有爲去惡如仇愛民如子創建學校士民建祠立碑頌其德

統一

志

劉伯正字直卿父簡爲趙汝愚客嘗書慶歷四諫奏議授伯正而伯正以開禧元年舉進士調太平主簿歷遷監察御史有事於明堂雷電忽至執事者鮮不離次伯正立殿下紳笏儼然帝遂以大任期之遷左司諫疏言兵籍寢廣糧餉益艱請豫備軍食又言銓選財計刑獄積樂乞以願治之心而急董正治官之

圖以勤政之思而嚴審察計吏之法又言飭邊備處
流民防奸盜三事帝皆善其言歷知廣州太平權刑
部尙書尋拜參知政事以言者累疏予祠尋復舊官
致仕卒時論伯正立朝以靜重鎮浮不求名譽善藏
其用云 宋史節

劉泌字伯正古埠人嘉泰進士授南海簿紹定初歷
官郡縣臺省院部以母老乞養嘗爲母祈壽甘露三
降庭梅 參通志餘詳雜記

按舊志劉泌傳亦字伯正嘉泰二年進士考郡邑
餘干縣志 卷之十二 人物 宦業 二十二

志科目則有此者無彼故陳赤石修志定爲一人
而登第屬之嘉泰不知何以復出且泌傳蒼龍等
事似涉渺茫故附入雜記茲仍通志分載存其舊
也 參三立攷

史元美字實夫寶慶二年進士授寧鄉主簿甫至卽
荆濂溪書院發明周子之學且請額於朝士風大振
歷黃州通判辯釋荆南官吏大斛受納之罪勘豁梧
州盜冤累者五十餘人元美天性寬厚世味澹然自
奉儉薄待人接物悉以和嘗言平生力學獨愛朱子

平實二字因扁以自號子愿字舜欽以廕歷光山軍判官救荒有善政寬失機殿將之誅止揚州桑麥稅尤爲時所稱德祐後退隱林泉築堂所居之西顏曰志古里人李思衍爲賦志古溪堂詩今其詩尙存兩

山集中

三立考

甘夢英南隅人淳祐進士調古田簿選爲刑部郎平反冤獄直聲大起賈似道爲相上書陳淮襄攻守策不報棄官歸號休休道人

舊志

李宏萬年鄉九芝人景定浙東漕元仕淮西制置司

餘干縣志

卷之十二

人物

宦業

二十三

參議官時有犯邊者制置欲殺之爭以罪不當死得活者六十人老歸田里建義學教鄉族子弟每歲積粟待饑以濟貧者子鑄有父風尤好賓客

舊志

元

李思衍字克昌九芝人工詩伯顏渡江遣武良弼狗饒以思衍權樂平尋授袁州治中入爲國子司業世祖以安南未附屢遣將攻之不克召拜禮部侍郎副參議萬奴奉使招諭及至王奉詔禮畢坐以待見思衍曰大國之臣不拜小國之君禮也左右爲失色王

笑曰敬其主以及其使亦禮也遂抗禮思衍宣諭威德詞旨簡切王大敬之卽奉表欵附驢使甚厚時萬奴受思衍不受旣還上慰問怒萬奴受驢思衍曰萬奴受安小國之心臣不受全大國之體上賢之尋授浙東宣尉使越二年召入覲擬拜南臺御史以疾卒有兩山詩集天南行稿

參林志

韓光甫字炎鳳大德間薦爲怯薛未幾授承務郎杭州路總管判官剖決疑獄築西湖堤以捍水田有異政遷汀州路同知循州知府

舊志

餘干縣志

卷之十二

人物

宦業

二十四

明

劉榮字伯榮德化鄉人洪武進士選翰林庶吉士轉監察御史居官廉介卒無以爲歛

舊志

黃信中詹坊人知錢塘縣廉介自守先知樂清縣奸民給寡婦同至京誣告鄉民嘯聚至鼓下則自逸去御史繫本婦以聞詔行所司會鞠信中廉得其情力爲辨誣罔之狀全活者三百餘人僅三人坐死擢知杭州改溫州永嘉有因盜殺一家三人者獄經年不決信中齊沐爲文告城隍遂鞫眞盜遠近稱之在郡

多異政卒於官溫人立祠祀之

舊志參明史

韓諒字子貞牌岡人洪武間昌平主簿以政績陞北

平道監察御史嘗作御史箴以自規

舊志

徐爵字宗器畱塘人永樂十三年進士授監察御史

立朝謇諤風力素勁人不敢干以私太宗嘗以小御

史呼之

叅林志

高峻字恒安西隅人宣德五年進士授監察御史巡

按巴蜀平潘松叛按畿內辨冤獄倭寇犯浙賜勅假

便宜行事倭遁去陞浙江參政巡海道丁外艱奪情

餘干縣志

卷之十二

人物

宦業

二十五

起之俾卒所事因請沿海立堡戍以兵倭患稍戢

趙哲字民彝西隅人領天順三年鄉薦遊北雍祭酒

陳選每與討探經旨就銓試葉盛奇其策授衡州同

知憂去補嘉興時揚繼宗爲守哲寬以濟之清戍例

以多寡定黜陟哲曰驅民爲兵寧三黜不忍倭頻掠

海鹽哲戒嚴乃遁嘉苦海潮哲築隄捍之有囚以媒

孽具獄哲廉得情而釋者六人擢兩浙運同更定三

限法民便而課亦足乞歸家居十餘年讀書自樂不

飲酒侍無婢死至無以葬清操蓋天性云

參三立考

附舊志哲父字自牧行足善俗張元禎作傳比之
王彥方云

張本字汝崇下南塘人領成化元年鄉薦知南靖縣
始至縣堂吏舍幕庫悉捐俸以次修葺上杭溪南寇
至本團集民快并招募番客扼險隘賊不敢犯以丁
外艱去

福建通志

劉憲字文綱東隅人少穎敏成化己丑進士授南京
吏部主事陞文選郎中陝西參議時大饑憲儲粟賑
民擢參政爲人凝重宏遠不攻訐人過失以文學負
餘干縣志

卷之十二

人物

宦業

二十六

時望著述甚多有春秋胡傳序行於世

盛德字至善塏前人宏治庚申領歲薦任四川威遠
訓導德聲遠播訓士多成立祀名宦嘉靖丙戌代巡

徐岱檄祀鄉賢

舊志

李緝字繼明後街人領宏治十四年鄉薦正德中由
濮州牧遷泉州同知仁慈果斷以伸釋枉滯與省民
事爲先民有投牘大司者輒號乞曰牘必下於李二
府非李二府不如還我牘也嘗嘆泉州戎伍勾補之
弊佐郡一年凡隣郡戎衛檄至辨真僞量遠近審民

夫眾寡蘇瘁之數權其當行與否民賴以全室家相慶陞魯府長史

福建通志

胡守字仁甫東隅人正德戊辰科進士初授處州推官持法明允擢吏部稽勲司郎中守正不阿忤權璫調常州通判轉蘇州同知有政績陞陝西僉事逼近套彝防守謹嚴邊境賴以無恐親老乞養著有東村集

陳憲字伯度同良人正德進士授溧水知縣均差徭賑饑饉除豪猾擢工部主事督呂梁洪官民舶便之餘干縣志

卷之十二

人物

宦業

二十七

轉刑部員外訊獄稱平陞廣西僉事時賊黃鏐搆亂兩征失利憲至三旬平之總巡上其功賜金幣陞貴

州參議

舊志

章書字宏載西隅人正德九年進士授南京吏部主事歷員外郎中陞四川順慶知府時大饑講求荒政民無遷徙屬邑盜起多方撫緝撫按上其事賜金幣超陞四川參政改廣西分守府江勦平七山寇民賴以寧以廣西按察使致仕

通志

周璣天儀龍津人嘉靖丁酉亞魁任淮慶推官陞宿

州知州景泰時天長鳳臨災傷以宿代徵秋糧數千石沿爲例民甚苦之璣陳請改一千石民德之陞順天治中

章世禎字克昌前街人嘉靖二十二年舉人知武陵擢知德州未幾以事降判徐州尋起六合令以治行第一擢知徐州治河奏功晉秩奉直大夫致仕與揭思孔修邑志紀事簡嚴時論重之思孔字希之揭坊人癸卯鄉舉官潛江知縣

舒邦儒字真卿南隅人萬歷二年進士事繼母以孝

餘干縣志

卷之十二

人物

宦業

二十八

聞嘗推產讓季父艱嗣買妾得淮揚孫氏女臨行母不忍別邦儒太息曰吾求男而使人以女病乎遂厚贈金而遣之初任徽州推官刑獄平允歛土故籍絲稅會下清丈之令大司徒殷歛人也指均五邑而爲歛爭甚力邦儒正色裁之事得息擢南刑部主事歷正郎卒於官所著有學庸管見春秋世業左傳目錄

本通志參三立考

徐夢暘字瑞亭黃坵埠人萬歷進士初授行人遷刑部郎中恤刑江南清潔有聲活死囚數百人事聞特

賜內帑金帛龍碗冬衣

舊志

湯塾號覺宇西隅人萬歷乙酉舉人授柳州通判時居山黃峒寇暴積十數年不能定三臺議大集兵勦之塾曰是洩機宜賊不成擒而民且擾矣亟請身任厥事遣閒繕關計擒渠魁覃公李四保等撫南羅十六村以散其黨旬月二峒悉降或欲誘而盡殲者塾持不可簡其黠豪數人令朔望詣官參謁漸以化之輯綏有道遂底永寧陞廣州同知俱有治蹟卒葬祝

橋村

舊志

餘干縣志

卷之十二

人物

宦業

二十九

袁應龍字時見東隅人以選貢授羅田知縣申請興革事宜裁冗役復倉廩嚴保甲立會課以宏教育分花戶以便輸納當路廉其賢皆有循良之譽以母老

致仕

參舊志

胡舜允字明祚西隅人萬歷三十八年進士質美好學名節自勵爲本邑鑄鐵斛胥役不得意爲增減初任桐鄉多善政詳理桐拙操錄民鑄銅像以祀歷任大理寺評事刑禮二部郎中轉福建僉事所著有春

秋解崇雅堂集

參八年志

葉景先字奕武一字仲光大梧人萬歷三十七年鄉薦授弋陽教諭遷知亳州時寇初熾亳當賊衝景先修城浚隍募鄉兵釋才有力者爲長作訓兵錄以示之部伍器械備焉又作訓士錄迪以講學修身之要賊圍城者三皆力戰却之射殪金胄緋袍賊李自成父也上功於朝有忌之者僅轉兩浙運副俄轉知汀州府移疾歸卒於家子應震另有傳

三立考

按崇禎九年亳州知州葉景先同守備查應才有盧家廟之捷事見吳梅村綏寇紀畧注

餘干縣志

卷之十二

人物

宦業

三十

胡璉字不器胡坊人崇禎戊辰進士知山東曹州政簡刑清禮士愛民考治行卓異陞北工部虞衡司郎中以治河卒於官

舊志

葉應震字長東一字蒼雷崇禎十年進士時楚氛孔亟起復楊嗣昌爲大司馬應震以新進士上章擊之不報授都水司主事督視河工費省而役就與理齟大璫抗幾致中傷俄備兵青州繩驕藩以法嚴屬吏加耗中丞聞警遁正色止之力籌兵餉卒無虞移鎮蜀之私潘未行會父疾告歸省視晝不下箸夜不解

帶者六閱月居喪哀毀骨立一日晝忽陰霾見父木主自移泫然曰先靈告我矣卽日扶襯入山事母孝養備至母歿茹蔬廬墓應震幼負遠志世居介胡文敬碧峯南谷二書院閒銳意聖賢之學嘗曰士不立志徒浸淫於利欲之私能文曷貴所著有易鑑合參五經纂註四書貫皆燹於兵今所存梧叟集凡詩文十二卷

參三立攷

盧兆熊號介石西隅人崇禎庚辰進士爲番禺令甫數月治具畢張時粵東海寇猖獗熊督師進討相度

餘干縣志

卷之十二

人物

宦業

三十一

寇營因曰蓮子洞寇巨寨也破此則諸寨不足慮矣兵進搗其穴俘斬甚眾有平海寇論後丁外艱隱居

著玉樹堂文集

參舊志

國朝

汪正澤號虛谷瑞洪人孝子耳黃幼子也性醇謹通經史登乾隆乙丑進士卽用浙江知縣委署處州青川興利革弊民感其德爲懸民之父母額於署前供長生牌於豸山旋授武義縣涖任三年政績茂美立茶亭造大橋裁雜稅建書院善政甚多上台嘉其才

列上考嗣卒於官人共哀之

徐強字仁剛南隅人參贊監軍副使光璧之子有勇
畧隨父征閩父被創強力救卒得父屍康熙十三年
耿精忠反圍溫州軍民將變計強諭之曰棄主從賊
罪且通天況兵民雜處玉石難分一旦屠城獨保無
恙乎眾懾服強遂破逆十九寨殺賊四千餘名恢復
海澄縣擒僞將楊吉等十一人俘獲甚多入城安撫
歷守備署副將印錄功加一等復加十九等授左都
督仍紀餘功五次由山西新平參將陞山東臨清營
餘干縣志 卷之十二 人物 宦業 三十二
副將以戢兵靖盜安民視河僭運爲事清源諸君子
誦曰公蕩平閩疆海內率服乃由新平移鎮來清數
載兵戢民安今

新恩特諭武臣副總兵得與祭

文廟公以儒將風流拜舞其閒俎豆生輝矣旋有

旨召見記名仍復原任乞老以原品休致

誥授榮祿大夫軍民焚香餞送至二十里舖年七十餘卒

其子德一工書畫以功臣後入監肄業

吳昭號蔚堂西隅人少卓犖家貧嗜讀書年十九冠

童子軍乾隆癸卯舉人乙卯 大挑一等官河南軍營辦理數年幹員有聲任魯山重士愛民一切吏役無所擾突驚賊匪張漢潮犯境募鄉勇身先荷戈以虔劉厥敵維時捐廉修復琴臺書院建弦歌亭增設膏火宏獎士類與民休息而烽火飛來寶邲教匪又猖獗矣日隨撫軍進勦引官兵親冒矢石搗其巢擒賊酋斬之妖氛掃蕩軍師凱旋奏蒙

恩旨陞授同知調安陽下車政事視在魯倍加勤慎偶值

凶荒爲民請命不忍以追呼累赤子官愛民民亦德

餘干縣志

卷之十二

人物

宦業

三十三

官後因事註吏議安魯士民並請納鍰保畱格於例歸來兩袖清風四壁蕭然終不失儒者氣象